

in suo loco romanisse domino Georgio Coresi suo fratello, quali, insieme con li altri quatro nobeli prenommati devotissimamente a' piedi de la Sublimità Vostra debino supplicare li capitoli infrascripti:

385 I. Perchè la importantia de li tempi presenti cussi pericolosissimi richiede che quello se die fare in uno anno se faci in una hora, se possibel fusse, et havendo nui fidelissimi nobeli pheudati et sviscerattissimi de la Serenità Vostra cittadini deliberato fortificar insieme con la Serenità Vostra la città e borgo de Candia, contenti de supportar plui gravemente di quello pol portar le debil force nostre, se ben dovessimo vender le veste, *devotissime* supplicamo Vostra Sublimità se degni voler contribuir, come *alias* l'ha fato, la mità de la spesa insieme con li zudei de questa città; et perchè la Zueca non è in quel esser che la era per avanti, siamo contenti Vostra Serenità toglia ancor in sua portion el clero, et per l'altra mità nui nobeli pheudati et cittadini, et li contadini per angarie, quali per le sue spese nui a conto de la portion nostra le faremo, metando a monte cento (?) soldi 8 de tornesi per testa al zorno et lo resto daremo de contadi. Et perchè crediamo che a questa fortificatione de la città et borgo ge intraria non manco de ducati 60 milia, i quali impossibel saria trovarli per uno anno, et *etiam* che li se trovasse, *quod est impossibile*, i non se potria spender che ben siano spesi et messi in opera per uno anno, però habiamo deliberato de offerir in cinque anni nui soprannominati ducati 30 milia, dagando Vostra Serenità altrettanti insieme con li zudei et clero, che se veniria a spender ducati 12 milia a l'anno, cioè ducati 6 milia Vostra Serenità con li zudei et clero, et altri ducati 6 milia nui nobeli pheudati, cittadini et borgesani che hanno intrada et facultà, non intendando el populo menuto, nè zente mechanica che per importantia non pono pagar; quali essendo ben spesi, se vedaria presto l'optata securtà de questa città et borgo. Non dubitamo, *imo* certi se rendiamo che da Vostra Serenità a questa nostra fedel et umil supplication saremo exauditi come da fidelissimi de la Serenità Vostra, a la qual *umiliter* si raccomandiamo, et a piedi di quella *iterum atque iterum* supplicamo la securtà de questa città et borgo.

II. Et perchè, se quel che fina mò è stà speso in la città et borgo fosse stà ben speso, et per una testa sola saria capace haver fortificato tutta la città et borgo; ma per esser venuto una man de rectori, a li quali non ha piacesto el principio de l'altro, parte de loro ha volesto ruinar el facto, et parte ha vo-

lesto dare opera altrui per non seguire la prima; sichè tal inconveniente è stato causa che fu butà via gran summa de danari, et siamo rimasti aperti da ogni banda, però *devotissime* supplicamo Vostra Serenità se degni mandarne duo inzenieri de la fabrica, a li qual Vostra Sublimità se degni consegnarge el modelo che parerà a Vostra Serenità sia el meglio a la securtà nostra, et quello principiar, perseverar et finir la fabrica de esso; nè altramente innovar fantasia, soto quelle censure et pene parerà a la Serenità Vostra, che altramente se perderia la spesa. Necessario è, *Serenissime Princeps et Domine*, che li inzenieri che Vostra Sublimità manderà a dar principio a questa opera siano fermi qui fino la fin de l'opera, altramente mai se compirà, nè se farà cosa che ben stia; et cussi devotissimamente supplicamo Vostra Sublimità se degni far sia inviolabilmente observato.

III. Rechiedendo le importantissime occorrentie de li tempi presenti, *Serenissime et Inclite Princeps*, gaiardo et esecutivo principio con optimo fine a questa fortificatione de la città et borgo, bisogna che el danaro sia prompto a li bisogni per non interpor tempo de mezo, però devotissimamente supplicamo Vostra Serenità, se degni dedicare per la sua portion ch'è de questa camera li denari dedicati a la cassa de lo Excellentissimo Consejo de' X per l'armar, che per questi 10 anni Vostra Serenità se degni dedicarli a questa fabrica. Con quelle stretture 386 et pene sono tenuti li ministri de essi conservarli et ben spenderli in l'armar, con quelle medeme pene et stretture se debi conservarli et ben spenderli in questa fabrica; et Vostra Serenità provederà de li al supplemento di l'armar come sempre per avanti Vostra Sublimità era assueta de far. Li nostri veramente ducati 6 milia dovemo spender tra nobeli pheudati, cittadini et borgesani, volemo che siano scossi per duo nobeli et uno citizen electi per questo Consejo de la fidelissima università nostra, i quali habino la administration de essi per mexi 3, et a la fin de mexi 3 se debi cercar altri tre *ut supra*, a li quali li primi deba consegnar la cassa a la seconda muta et siano syndici de la prima, et cussi de muda in muda *successive*; et se alcuno se trovasse haver mal administrato, over usurpato de tal danari, sia *immediate* caduto a la pena de furante et li suo' beni sia obligato a satisfar el mal tolto et altrettanto per pena, la qual vada a la fabrica; ma *aliquo modo* non volemo che questi magnifici rectori et camerlengi, che *pro tempora* venissero in questa terra, et cussi li presenti, possino meter le